


BEBERAPA kenderaan mengelak takungan air yang melimpah di Jalan Bangsar disebabkan hujan lebat, petang tadi.

20 kereta tenggelam

■ Hujan lebat dua jam undang kesesakan teruk di ibu kota



KENDERAAN yang terperangkap dan tenggelam dalam banjir.

Mohd Hasbi Sidek
mohd.hasbi@hmetro.com.my

Kuala Lumpur

Hujan lebat hampir dua jam petang semalam, menyebabkan 20 kereta tenggelam di Jalan Lingkungan Budi berhampiran pintu masuk utama Universiti Malaya (UM) di sini.

Kejadian jam 7.30 malam itu turut mengakibatkan beberapa jalan di sekitar Bangsar, di sini, dinaiki air menyebabkan pengguna jalan raya terperangkap dalam kesesakan lalu lintas.

Tinjauan di terowong Jalan Pantai Baru di hadapan Angkasapuri turut menda-

pati laluan itu dinaiki banjir hingga kesesakan lalu lintas hampir dua kilometer.

Penolong Pengarah Bomba dan Penyelamat Kuala Lumpur Azizan Ismail berkata, 28 anggota bomba bersiap sedia menghadapi sebarang kemungkinan kejadian tidak diingini berlaku.

"Hujan lebat bermula jam 6 petang menyebabkan beberapa kawasan di Bangsar, Jalan Semantan dan Jalan Pudu, di sini, banjir kilat.

"Hujan lebat melanda beberapa kawasan antaranya di sekitar pusat bandar, Jalan Kinabalu, Jalan Kuching, Jalan Tuanku Abdul Halim, Lebuhraya Sultan Iskandar, Jalan Semantan, Brickfields, Bangsar, Jalan Pa-

hang, Jalan Sentul, Jalan Tun Razak dan di beberapa kawasan lain," katanya, semalam.

Menurutnya, hujan hanya berhenti jam 8 malam dan air mulai surut termasuk di kawasan yang dinaiki air setinggi satu meter.

Sementara itu, seorang pemandu teksi yang mahu dikenali sebagai Husin berkata, ketika kejadian jalan agak sesak menyebabkan kenderaannya tidak dapat bergerak.

"Hujan sangat lebat malah saya tidak dapat melihat jalan dengan jelas sebelum air naik mendadak. Tidak pernah saya mengalami kejadian sebegini apabila teksi saya dimasuki air," katanya.